



## Ufitziu pro su Sardu

Ufissiu po su Sardu  
Ufficio per la Lingua Sarda



Salude,

[srd-lsc]

Is linguistas de totu su mundu e s'Unesco narant ca sunt belle 6.800 limbas chi allegant a die de oe in su mundu. Ma ònnia chida una de custas si nde morit pro semper. E cun cussa faeddos, allegas, contos, istòria, meighinas antigas, mitos. In antis de su 2100 belle su 90% de is limbàgios s'at a isperdere. Unu nùmeru chi torrat cun sa presèntzia de is limbas in internet, su logu de s'iscritura mundiale. In internet est su matessi 90% a non èssere rapresentadu. Custu ca cuddas limbas non giughent una forma iscrita firma o ufitziale. Tando de cussas 6.800 limbas petzi 600 s'ant a sarbare. Achistidas dae s'iscola, chi ddas inditat a is pipios, ma peri dae is mass media, dae s'aministratzione, dae s'economia moderna. Ma pro cussu una cosa est a tènnere: s'iscritura.

Dae su beranu de su 2006 in Sardigna giughimus una forma standard pro iscriere su sardu, chi est sa chi semus imprende inoghe. Una forma chi rapresentat totu su sardu, e chi faghet a tirare bia a sa limba de chie est iscriende. De calesiat logu, isseberende faeddos e formas prus a presu a s'allegare de onniunu. Is règulas de iscritura sunt in intro de sa deliberatzione n.16/14 de su 18.04.2006, mutida Limba Sarda Comuna. In sa pròpriu deliberatzione bi sunt consìgios pro iscriere peri is limbàgios locales.

Ocannu amus incarreradu is atividades de s'Ufitziu pro su Sardu in sa Comuna de Elini. Sa punna de custu interventu est sa de amparare su sardu, in s'allegare de su logu comente in su sistema suo generale subra-locale. S'Ufitziu est finantiadu dae sa L. 15.12.1999, n.482 “Norme in materia di tutela delle minoranze linguistiche storiche”, sa primu lege istatale chi ponet mente a is printzìpios de s'Art. 6 de sa Carta de sa Repùbblica (“*Lo Stato tutela con apposite norme le minoranze linguistiche*”). Su trabballu movet in intro de s'interessu belle-gasi pesadu in contu de limbas de minoria, gasi a caràtore europeu (“Carta europea de is limbas de minoria e regionales”, de su 15.11.1992) e gasi regionale (L.R. 15.10.1997, n.26 “Promotzione e balorisatzione de sa cultura e de sa limba de Sardigna”).

Is atividades sunt su de ghiare s'Ufitziu, abertu a su pùblicu, e su de istèrrere su cursu de inditamentu e agiornamentu pro is dependentes comunales, chi at a èssere abertu a sa tzitadinàntzia. S'Ufitziu etotu at a contivigiare s'informatzione chi torrat a is políticas linguisticas, imprende su sardu allegadu (retzimentu) e iscritu (campànnia de visibilitade de sa limba).



Custu puntu etotu est de importu mannu, ca est in cussu chi intregamus s'affirmatzione de su sardu comente limba chi fatzat pro die de oe, gasi che totu is àteras limbas mundiales, ufitziales e nono. E in prus ischimus ca pro nois sardos a limba nostra non est unu nùmeru ebbia, ma est s'aprobbu e s'amostra de su caminu istòricu de su pòpulu nostru. Amus coladu in mesu de tressas malas e is babbos nostros nos ant giutu finas a imoe totu sa richesa, fortza e galania de s'allegare de eris. A nois tocat a ddu respetare e a nde ddu leare bia a su cras.

Su cursu de formatzione in pitzu de is temas de su bilinguismu at a allegare de s'impreu (chi faet a fàere) de su sardu in sensu modernu, de is raighinas e comente ddu trassare imoe, in unu caminu linguìsticu chi dae su particolare nch'essat a gheretzare bia a su generale. S'Ufitziu pro su su Sardu de sa Comuna de Elini movet in s'acramentu e in su trabballare paris cun is àteros ufitzios de sa Provintzia e de Sardigna, sende punnadu a s'ighire sa politica linguìstica giuta in totu su paris dae is istitutziones sardas.